

primis ex eò, quod Classicum Johannis locum 1. Joh. V, 7. in Versione Germanicâ omiserit; masculè tamen iis responsum, & calumnia dissipata est à *Nostratibus* Part. 1. Consil. Wittenbergens. f. 16, & *Gerhardò* Part. 2. Disput. Academ. p. 1303. seqq. ex quibus ea, quæ super hâc re in Officinâ Biblicâ p. 396. habet, *Michaël Waltherus* excerpisse videtur. Verum ut multi Mysterium hòc *hypotheticè* irritum reddere ausi sunt, ita imprimis id faciunt Ariani & Sociniani *theticè* æquè ac *hypotheticè*. Apparet illud ex multis, imprimis verò ex eò, quod aureum planè dictum 1. Joh. V, 7. variis modis irritum reddere conantur. Et istos quidem id facere, non adeò mirum videri poterat; Alios autem, & quidem ex Pontificiis æquè ac Calvinianis (vide *Gerhard. loc. cit. p. 1301. seqq.*) nonnullos idem voluisse, id verò perquàm mirū, non videri solum, sed & esse potest. Inveni tamen & antea sunt, qui id egerunt, & hodiè etiam superesse nonnullos, nimium proh dolor! notum est. Et prioribus quidem ex asse satisfacit B. *Gerhardus* in aureâ planè dissertatione ad Dictum hoc, quam Jenæ Anno Christi 1619. publicè habuit quæq; reservata nobis est in Parte 2. Disputat. Academ. edit. ultimæ p. 1293. seqq. digna ut ab omnibus Veritatem amantibus & æstimetur, & cum attentione legatur. Ortus tamen nostrò tempore est *Richardus Simon*, Presbyter Gallus, homo ex periculosis novitatibus conflatus, qui in *Historia Critica N. T.* eadem *Zizania* denuò dispergere, & palam disseminare non erubuit, id magnò conatu agens, ut eruditioribus persvadeat, Dictum illud, SS. Trinitatem planè demonstrans & evincens, non esse Johannis aut Canonicum. Quanquam verò asseri non possit, comma hoc in omnibus Græcis & Latinis Codicibus inveniri, testantur enim passim eruditi, & inter eos

*Gil-*